



REPOBLIKAN'I MADAGASIKARA
Fitavana - Tanindrazana - Fandrosoana



FAMINDRAM-PITANTANANA NY HARENA VOAJANAHARY AZO HAVAOZINA ALA TAPIA AO ANTANETY EST

VOI LOVAMAHAFINARITRA

Fokontany ANTANETY EST
Kaominina Arivonimamo II
Distrika Arivonimamo
Faritra Itasy

LAHARANA°:.....



Martsa 2023

FIZAHAN-TAKELAKA:

FIFANEKEM-PAMINDRAM-PITANTANANA -----	5
DRAFI-PANAJARIANA SY FITANTANANA -----	10
I. FANAZAVANA ANKAPOBENY -----	11
I.1 Teny fampidirana-----	11
I.2 Tanjona kendrena-----	11
I.3 Faharetany-----	11
II. Efitry ny faritra hajariana sy ho tantanina -----	11
II.1 Toerana ahitana ny Fokontany-----	11
II.2 Faritra ivelomana tantanin'ny VOI-----	14
II.3 Faritra ala hafindra fitantanana hoan'ny VOI-----	16
III. Ny mponina sy ny fivelomany -----	18
III.1 Ny mponina-----	18
III.2 Ny fiveloman'ny mponina-----	18
V.3. Rafitra mpanampy:-----	20
IV. Fitsinjarana ny faritr'ala isaky ny sokajim-pampiasana -----	21
IV.1 Toetoetry ny ala-----	21
IV.2 Sokajim-paritra-----	23
V. Fitsipika amin'ny ankapobeny -----	26
VI. Fitsipika hanajariana sy hitantanana sy fizaram-paritra tsirairay sy ny vokatra ao aminy -----	26
VI.1 Mikasika ny fampiharana ny zo nentim-paharazana.-----	26
VI.2 Mikasika ny faritra fampiasana maharitra-----	27
VI.3 Mikasika ny faritra atevenina sy ampiharana ny zo nentim-paharazana-----	27
VI.4 Mikasika ny faritra arovana sy ampiharana ny zo nentim-paharazana-----	28
VI.5 Mikasika ny faritra arovana tanteraka-----	28
VI.6 Mikasika ny faritra natao ambolena sy tsy voasokajy-----	29
VII. Andraikitr'ireo ankolafin-kery voakasika (mifanampy amin'ny bokin'andraikitra) -----	29
VII.1 Ny Fari-piadidiam-paritry ny tontolo iainana sy ny fandrosoana lovain-jafy.-----	29
VII.2 Ny Kaominina-----	29
VII.3 Ny VOI LOVAMAHAFINARITRA-----	29
VII.3.1 Asa fiofanana-----	29
VII.3.2 Asa fanentanana sy fampahafantarana ny famindram-pitantanana izay natao-----	30
VII.3.3 Asa fanajariana.-----	30

VII.3.4	<i>Asa fanaraha-maso</i>	31
VII.3.5	<i>Asa fifandraisana amin'ny any ivelany</i>	31
VII.3.6	<i>Fizohiana sy tomban'ezaka</i>	31
VIII.	Ny drafitr'asa isan-taona	32
IX.	Fomba fampiasaina ity drafy-panajariana sy fitantanana ity	37
IX.1	Ho an'ny VOI LOVAMAHAFINARITRA	37
IX.2	Ho an'ny Kaominina Arivonimamo II	37
IX.3	Ho an'ny Mpanohana	38
IX.4	Ho an'ny Foibe iraisam-paritry ny Tontolo Iainana sy ny Fandrosoana Lovainjafy Itasy	38
	BOKIN'ANDRAIKITRA	39
	DINAM-PARITRA	45
	DRAFI-PIHARIANA	46
	TOVANA	47

LISITR'IREO TABILAO :

Tabilao 1 : Ny zanaparitra hita ao amin'ny faripiveloman'ny VOI	14
Tabilao 2 : Ny velaran'ireo zanaparitra.....	14
Tabilao 3 : Faritr'ala afindra fitantanana.....	16
Tabilao 4 : Isan'ny mponina, mitsinjara araka ny taona	18
Tabilao 5 : Tahirin-kevitra ara-pambolena.....	19
Tabilao 6 : Tahirin-kevitra ara-piompiana	19
Tabilao 7 : Fampiasan'ny mponina ny vokatry anaty faritra.....	20
Tabilao 8 : Ireo rafitra mpanampy.....	20
Tabilao 9 : Anarany sy velarany ary toetoetr'ireo ala	21
Tabilao 10 : Fisokajiana ireo faritr'ala tapia araka ny tanjom-pitantanana	23
Tabilao 11 : Fisokajiana ireo faritra araka ny tanjom-pitantanana	24
Tabilao 12 : Fepetra mikasika ny fampiharana ny zo nentim-paharazana	27
Tabilao 13 : Ny drafitr'asa mandritra ny telo taona ho an'ny VOI	33

LISITR'IREO SARIN-TANY :

Sarin-tany 1 : <i>Toerana ahitana ny VOI</i>	13
Sarin-tany 2 : <i>Faritra tantezaina</i>	15
Sarin-tany 3 : <i>Fanehoana ireo ala afindra fitantanana</i>	17
Sarin-tany 4 : <i>Fanehoana ny toetoetr'ireo ala afindra fitantanana</i>	22
Sarin-tany 5 : <i>Fanehoana ny drafy-panajariana ny faritra afindra fitantanana</i>	25

FIFANEKEM-PAMINDRAM- PITANTANANA

**NY MINISTERAN'NY TONTOLO IAINANA SY NY FANDROSOANA LOVAIN-JAFY,
IZAY SOLOIN-DRAMATOA TALE IRAISAM-PARITRY NY TONTOLO IAINANA SY NY
FANDROSOANA LOVAINJAFY TENA**

**SY
NY KAOMININA AMBANIVOHIRA ARIVONIMAMO II**

ARY

**NY VONDRON'OIONA IFOTONY (VOI) « LOVAMAHAFINARITRA », IZAY
SOLOIN'ANDRIAMATOA FILOHAN'NY FIKAMBANANA TENA**

Araka :

- Ny lalàna 96-025 tamin'ny 30 septambra 1996 mikasika ny fitantanana eny an-toerana ny loharanon-karena voajanahary mety havaozina ;
- Ny lalàna 97-017 tamin'ny 08 aogositra 1997 manavao ny lalàna fitantanana ny ala ;
- Ny didim-panjakana laharana faha-97-1200 tamin'ny 02 oktobra 1997 mampanaiky ny poititikam-pitantanana ny rano sy ala ;
- Ny didim-paniakana laharana faha-2000-027 tamin'ny 13 janoary 2000 mikasika ny VOI miandraikitra ny fitantanana eny an-toerana ny loharanon-karena voajanahary mety havaozina ;
- Ny didim-pitondrana 2001-122 tamin'ny 13 Jona 2001 mametra ny fomba fanatanterahana ny famindram-pitantanana ny harena voajanahary amin'ny vondron'olona ifotony ;

Dia mifanaiky fa :

Andininy-1 : Havaozina indray ny famindrana amin'ny Vondron'Olona Ifotony (VOI) LOVAMAHAFINARITRA, ao amin'ny Fokontany Antanety Est, ny fitantanana ny Ala Tapia izay voafaritry ao amin'ny andininy 2 amin'ity fifanekena ity.

I- Faritra ampiharana an'ity fifanekena ity.

Andininy-2 : Ity fifanekena ity dia ampiharina amin'ny faritra izay manana velarana **727** ha ao anatin'ny Fokontany Antanety Est ary voafaritry toy izao:

- Avaratra: Fokontany Antanetilava;
- Atsinanana: Fokontany Manerinerina;
- Atsimo: Fokontany Manankasina;
- Andrefana: Fokontany Ambohijatovo.

II- Ireo harena voajanahary iharan'ity fifanekena ity.

Andininy-3 : Ampiharana amin'ireo harena voajanahary rehetra, notantanin'ny Sampan-draharaha miadidy ny Ala, ao amin'ny faritra voatondro ao amin'ny andininy 2 sy izay rehetra voalaza mazava tsara ao amin'ny Bokin'Andraikitra (Cahier de Charges) sy ny drafy-panajariana ity fifanekena ity.

III- Tanjona.

Andininy-4 : Natao ity fifanekena ity mba ho fampandraisana andraikitra ny VOI amin'ny fitantanana ny harena voajanahary azo havaozina ary mba hampaharitra ny fampiasana azy ireo mba ho lovain'ny taranaka maro mifandimby.

IV- Zava-kendrena

Andininy-5 : Kendrena amin'ity fifanekena ity ny

- fandraisan'ny olona tsirairay andraikitra amin'ny fahaiza-mampiasa ny ala sy ny harena voajanahary ao aminy izay azo havaozina ka hampaharitra azy ireo ;
- hampirindra ny fitantanana ny ala sy ny vokatry ao aminy ;
- hampitombo sy hanatsara ny loharanon-karena voajanahary ary ny fari-piainan'ny tsirairay.

V- Faharetany.

Andininy-6 : Folo (10) taona no faharetan'ity fifanekena ity ary azo havaozina izany raha hita fa mandeha tsara ny fitantanana, ary miankina indrindra amin'ny tombana izay hatao amin'ny fiafaran'io fe-potoana io.

VI- Anjara asan'ireo voakasik'ity fifanekena ity

Andininy-7 : Anjara asan'ny :

A)- Vondron'olona ifotony ny :

- manaja ny fepetra rehetra voarakitra ao anatin'ity fifanarahana ity sy ny lalàna manankery mifehy ny ala ;
- mampihatra ny Dina ho enti-manatanteraka ny drafi-panajariana sy fitantanana ;
- mamolavola sy manatanteraka ny drafit'asa na tetik'asa isan-taona mifanaraka amin'ny teti-panajariana ho fampandrosoana ny faritra ;
- manaraka an-tsakany sy andavany ny toromarika amin'ny drafi-panajariana sy fitantanana ary izay voalazan'ny bokin'andraikitra ampanarahana ity fifanekena ity ;
- manampy sy manolotra amin'ny Kaominina sy ny Lehiben'ny Ala ao Arivonimamo ireo olo-meloka izay tsy voasahan'ny Dina ny heloka vitany.

B)- Sampan-draharaha miadidy ny ala ny :

- manoro hevitra ny VOI amin'ny fitantanana ny faritra sy ny fanarahana ny drafi-panajariana ;
- manara-maso ny fampiharana ny fitaovam-pitantanana ;
- manao fitanana an-tsoratra (procès-verbal) ary mitondra eo anatrehan'ny Fitsarana izay olo-meloka tsy manaja ny Fitsipi-pitantanana na heloka tsy voasahan'ny Fitsipi-pitantanana na ny Dina ;
- mandray andraikitra tandrify azy amin'ireo olona tsy vonona hanaraka ny Dina ;
- manampy ny VOI amin'ny asa fampandrosoana ny faritra ;
- Manao ny tombana isan-tsokajiny.

D)- Kaominina ao Arivonimamo II

- miahy ara-panjakana ny VOI ;
- manara-maso ny fitantanana ataon'ny VOI ;
- manorohevira ny VOI amin'ny fomba fitantanana ny vola ;
- manampy ny VOI amin'ny fampiharana ny Dina ho an'ireo olona tsy mety manaraka izany fa indrindra ireo olona tsy mponina ao amin'ny faritra ;
- manampy ny VOI amin'ny asa fampandrosoana sy ny famahana olana ;
- mandray anjara amin'ny tombana isan-tsokajiny ;
- mananatra ireo olo-meloka amin'ny fankatoavana ny Fampiharana ny Dina alohan'ny hitondrana azy eny amin'ny Lehiben'ny Ala eny Arivonimamo ;
- mandamina ireo olana mety hitranga eo amin'ny Fikambanana mifanolobodirindrina aminy ;
- manentana sy manampy ny VOI amin'ny fitadiavana sampandraharaha afaka hanampy ny VOI eo amin'ny fitantanana ataony sy ny hanatsarana ny vokatry ;
- mampahafantatra ny vohitra sy ny Kaominina manodidina ny fisian'ny famindram-pitantanana sy ny Dina ;
- mandamina sy mifampiraharaha amin'ny vohitra sy ny kaominina manodinina raha misy olana ateraky ny fampiharana ny fitsipi-pitantanana

VII- Ireo andraikitra momba ny fitantanana azon'ny VOI atao.

Andininy-8 : Azon'ny VOI atao ny :

A)- Momba ny zo nentim-paharazana :

- maka hazo maty na nazeran'ny rivotra ho fampiasana andavanandro (kitay) fanangonana ireo voatapia na fiotazana zavamaniry atao fanafody na sakafo
- maka ny vokatra ao anaty faritra tantanina araka ny voafaritry ny fitsipi-pitantanana
- mihaza ireo biby azo hazaina izay ampiasana ny fitaovana nentim-paharazana

B)- Ankoatry ny zo nentim-paharazana :

- mitrandraka araka ny drafi-panajariana sy fitantanana ary mivarotra ireo hazo ao amin'ny voly hazo natokana ho fitadiavam-bola (kininina sy kesika, sns...) ;
- manome ny heviny amin'izay fangatahan'olona tsy mpikambana amin'ny Vondron'olona Ifotony te-hampiasa ireo harena voajanahary azo havaozina ao amin'ny faritra ;
- mametra sy mandray ireo saram-pitantanana ,
- manao tatitra amin'ny Kaominina sy ny Ben'ny ala ny fandehan'ny fitantanana isam-bolana na isaky ny misy fisehoan-javatra ;
- manao tatitra ary mitondra any amin'ny Kaominina sy any amin'ny Lehiben'ny Ala eny Arivonimamo izay olona manao fahadisoana ka tsy manaiky hampiharana ny Dina na tsy voasahan'ny Dina intsony ny fanasaziana azy (na mpikambana na tsy mpikambana) ;
- mampahafantatra ny Fokontany ny zava-misy amin'ny fitantanana.

D)- Momba ny rafi-pitantanana :

- mametraka fomba enti-mitantana ny faritra ary mifidy olona hisahana tanteraka an'izany izay antsoina hoe : Komity mpitantana (Comité de gestion).

VIII- Ireo andraikitra tsy azon'ny VOI atao.

Andininy-9 : TSY azon'ny VOI atao ny :

- manome fahazoan-dalana hitevy ala-velona ;
- manome fahazoan-dalana hikapa hazo ankoatry ny zo nentim-paharazana ;
- manao fitanana an-tsoratra (procès-verbal) ireo heloka tsy voasahan'ny Dina intsony ny fanasaziana azy izay ampiakarina eny amin'ny Fitsarana.

IX- Ireo andraikitra ny sampandraharaha miadidy ny ala

Andininy-10 : Manana andraikitra ny Sampan-draharaha miadidy ny ala amin'ny :

- fampianarana ny VOI ny lalàna manan-kery mifehy ny Ala ;
- fampiharana ny sazy amin'ny VOI raha toa misy fahadisoana nefa tsy fantatra izay nanao izany ;
- fanomezana ny fahazoan-dalana hikapa hazo, afa tsy ny momba ny zo nentim-paharazana, rehefa avy nankatoavin'ny VOI ;
- fanaovana an-tsoratra (procès-verbal) ireo fandikan-dalàna tsy voasahan 'ny Fitsipi-pitantanana ary mitondra ny olo-meloka eo anatrehan'ny Fitsarana ;
- fanampiana sy fanarahamaso ny fanatanterahana izay voasoratra ao amin'ny bokin'andraikitra sy ny drafi-panajariana ny atiala ary afaka mangataka fanazavana amin'izay rehetra ilainy ;
- fanampiana ara-teknika amin'ny fanatanterahana ny asa ataon'ny VOI ;
- fanampihan-kevitra amin'ny fanohizana na fanafonana ny fitantanana.

X- Fanaraha-maso ny fitantanana sy drafi-panajariana.

Andininy-11 : Azon'ny Sampan-draharaha miadidy ny ala, ny Ben'ny tanàna, ny Filohan'ny Mpanolotsainan'ny Kaominina ary ny Delegem-panjakanan'ny Kaominina atao ny misava ireo bokim-pitantanana eo ampelan-tananan'ny VOI. Raiketina an-tsoratra ao amin'ny bokin'ny VOI, ny zavatra mety na tsy mety hitany nandritra ny fisavana dia anomezany ny heviny.

Andininy-12 : Ny Sampan-draharaha miadidy ny Ala irery ihany no manao ny fanaraha-maso ny fitantanana sy ny tomban'ezaka.

Ireo olona ivelan'ny Sampan-draharaha ny Ala ka mahatsikaritra ny tsy fetezan'ny fitantanana ara-teknika dia mampandre avy hatrany azy ireo am-bava na an-tsoratra mba afahan'izy ireo mandray ny andraikitra tandrify azy.

Andininy-13 : Miara-manao tombana isaky ny enim-bolana ny fandehan'ny Fitantanana ny Fikambanana sy ny Sampan-draharaha miadidy ny Ala ary ny Kaominina Arivonimamo II.

XI- Fanapahana nv fitantanana

Andininy-14 : Raha tsapa fa tsy mitarika amin'ny fananana maharitra ireo harena voajanahary azo havaozina ny fitantanana ataon'ny Fikambanana dia omen'ny Sampan-draharaha miadidy ny Ala fampitandremana an-tsoratra izy ireo.

Raha mbola miverina io tsy fahaiza-mitantana io dia omena taratasy fampiatoana amin'ny fotoana voafetra ny VOI.

Raha mbola mitohy ny tsy fahaiza-mitantana na mhola tsy tapitra aza ny fe-potoana nitantanana dia averina manontolo amin'ny Sampan-draharaha miadidy ny Ala ny fitantanana.

Andininy-15 : Izao fifanarahana izao dia manambara ny maha ara-dalàna ny fitantanana ireo harena voajanahary azo havaozina misy ao an-toerana. Ny famindram-pitantanana dia tsy midika ho famindram-pananana.

Natao teto, ny

Ireo Mpifanaiky

Ny Tale Iraisam-paritry
ny Tontolo Iainana sy ny Fandrosoana Lovainjafy,

Ny Filohan'ny VOI,

Ny Ben'ny Tanàna Arivonimamo II,

Ny mpanatrika

Ny Lehiben'ny Distrika ARIVONIMAMO,

DRAFI-PANAJARIANA SY FITANTANANA

I. FANAZAVANA ANKAPOBENY

I.1 Teny fampidirana

Manana ny lanjany eo amin'ny fiainan'ny mponina andavanandro tokoa ny fisian'ireo ala Tapia izay harena voajanahary ao amin'ny Fokontany ANTANETY EST. Ankoatry ny fakana ireo vokatra maro samy hafa misy ao anatin'ny faritra dia miaro ny nofon-tany ihany koa ireo zava-maniry ao aminy.

Efa roapolo (20) taona mahery izao no nitantan'ny VOI ny harena voajanahary ary taorian'ny tomban'ezaka izay natao dia hita sy tsapa fa ny fanohizana ny famindram-pitantanana no paikady mbola tena mahomby amin'ny fiarovana ny ala sy ireo harena voajanahary ao anatin'ny faritra.

I.2 Tanjona kendrena

Mba hiarovana ny ala sy ny zava-misy ao aminy ary ho fampandrosoana ny faritra hiveloman'ny mponina eto amin'ny Fokontany ANTANETY EST, dia natao ity Drafy-panajariana sy fitantanana ity ho ampiasain'ny VOI LOVAMAHAFINARITRA. Izany dia afahany manajary, manatsara, miaro ary koa mitantana amin'ny fomba maharitra ny faritra sy ny vokatra ao aminy.

I.3 Faharetany

Folo (10) taona ny faharetan'ny fifanekem-pamindram-pitantanana ny ala. Manankery mandritra io folo (10) taona io ity drafim-panajariana sy fitantanana ity.

Araka ny zava-misy anefa dia azo atao ny mitondra fanovana amin'ity drafy-panajariana ity. Ny fanitsiana rehetra mety ho atao kosa dia tsy maintsy hifanarahana'ny Sampandraharahan'ny Ala, sy ny VOI LOVAMAHAFINARITRA ary ny Kaominina Arivonimamo II.

Marihina fa rehefa misasaka sy rehefa tapitra ny folo (10) taona dia hisy fizohiana atao mikasika ny fitantanana ny ala sy ireo vokatra ao aminy, manaraka izany ny tomban'ezaky ny asa vita. Aorian'izay dia mety hisy fanitsiana ho fanatsarana ny fampiasana sy ny fitantanana ny ala. Ny fanitsiana rehetra dia tsy maintsy hifanarahana'ny Sampandraharahan'ny Ala, sy ny VOI LOVAMAHAFINARITRA ary ny Kaominina Arivonimamo II.

II. Efitry ny faritra hajariana sy ho tantanina

II.1 Toerana ahitana ny Fokontany

Ny Fokontany ANTANETY EST dia ao anatin'ny Kaominina Arivonimamo II, Distrika Arivonimamo, Faritra Itasy. Marihana fa ao amin'ny îlot Antanety Est no Foiben-toeran'ny VOI. Izy ihany koa no renivohitry ny Fokontany ka sahabo ho 18 km miala ny renivohitry ny Kaominina no ahitana azy.

Iray ihany (mitovy) ny fangitry ny Fokontany sy ny fangitra mamaritra ny faritra tantanan'ny VOI.

Ireto manaraka ireto ireo Fokontany manodidina sy mamaritra azy:

- Avaratra: Fokontany Antanetilava;
- Atsinanana: Fokontany Manerinerina;
- Atsimo: Fokontany Manankasina;
- Andrefana: Fokontany Ambohijatovo.


Ilot efatra (4) no mandrafitra ny VOI dia:

- Antanety Est,
- Ampamoloana,
- Fianarantsoa,

- Amboasary.

Lalana mirefy 18 km eo ho eo no mampitohy ny Kaominina amin'ny Fokontany Antanety Est ary 15 km eo ny halavirany mihoatra amin'ny renivohitry ny Distrika. Mianatsimo mianaraka ny RN 1 hatreo Ambatonampoaka, ary avy eo dia lalan-tany mianavaratra izay mirefy 8 km no mihazo ny VOI LOVAMAHAFINARITRA. Fiara tsy mataho-dalana (4X4) no tena tonga any na dia mandritra ny maintany aza. Rehefa fahavaratra moa dia azo lazaina ho tena sarotra ny mankany amin'ny Fokontany Antanety Est.

Sarin-tany 1 : Toerana ahitana ny VOI



II.2 Faritra ivelomana tantanin'ny VOI

Ny velaran'ny faritra ivelomana tantanan'ny VOI dia 727 ha ary ahitana Ala Tapia, ala hafa, tanimbary, tanim-boly samy hafa, toeram-ponenana ary tany ngazana sy tanety.


Araka io efa hita eo ambony io ary dia ireto avy ireo singa mandrafitra ny fari-piveloman'ny VOI sy ireo toetoetra nahafahana namaritra azy tsirairay.

Tabilao 1 : Ny zanaparitra hita ao amin'ny faripiveloman'ny VOI

Zana-paritra	Toetoetrany
Ala Tapia	Faritra ahitana ala tapia mbola matevina, antoniny ary manify
Ala hafa nanahary	Harongana, Hazotokana, Andriadahifotsy, Ranjo, Ambora, Voamalefaka, Sevalahy, Hazondramahazo, Vaomaintilany, Vononoka, Simangy, Taratana, Taimbolavo, Fandramanana, Hazondandy, Kijejilahy, sns ...
Ala hafa novelena	Faritra ahitana karazan-kazo hafa novelena (Kininina, Kesika, akasia, sns ...)
Hazo nanahary	Tapia, Roetra, sns ...
Tanimbary	Tany natokana ambolem-bary, izay manamorona ireo renirano hita ao amin'ny faritra tantanina amin'ny ankapobeny
Tanim-boly	Tany natokana ambolena mangahazo, katsaka, legioma sy ireo vokatra isan-karazany ary fambolena-kazo toy ny kesika na kininina sy karazan-kazo hafa
Tanety	Faritra tsy ampiasain'ny olona noho ny antony maro samihafa, na haram-bato na tany tsy mamokatra intsony
Tanàna	Faritra ahitana ny trano fonenan'ny olona ao amin'ny fari-pivelomana
Biby dia	Vorona isankarazany (Matoriandro, Takatra, Maritaina, Kibobo, Tsipoy, Goaika, Papango, Hitsikitsika, Ramanavy, Tomanitailatsaka, Sorohitra, Tsintsina, Domoina, sns...), Sahona, Bibilava, Trandraka, Sokina, Tantely, Kary, sns...

Tabilao 2 : Ny velaran'ireo zanaparitra

Zana-paritra	Velarany (Ha)	Tahany isan-jato (%)
Ala Tapia	61,17	8,41
Ala hafa	23,60	3,25
Tanim-bary	108,46	14,92
Tany fambolena sy tanety	521,13	71,68
Tanàna	12,64	1,74
TOTALY	727	100



II.3 Faritra ala hafindra fitantanana hoan'ny VOI


Ny ala ho tantanana sy hohajarian'ny VOI LOVAMAHAFINARITRA kosa dia ireto ala na faritr'ala voatanisana manaraka ireto:

Tabilao 3 : Faritr'ala afindra fitantanana

Ireo ala ireo dia manana velarana sahabo ho **61,17 Ha**.

Laharana	Anaran'ala	Velrana (Ha)
1	Amboara	4,27
2	Ambohidray	12,16
3	Ambohimiadana	1,74
4	Antanetibe (Antaibe)	6,77
5	Ramaroanaka	13,82
6	Analavodivody	11,15
7	Andoharano	3,72
8	Antsahavory	7,56
	Totaly	61,17

Sarin-tany 3 : Fanehoana ireo ala afindra fitantanana



III. Ny mponina sy ny fivelomany

III.1 Ny mponina

Merina 100% no mandrafitra ny vahoaka ao ANTANETY EST. 960 ny isan'ny mponina ka 485 ny zaza sy ny ankizy ary 475 ireo lehibe raha toa ka 496 ny lahy ary 464 ny vavy. 310 kosa ny isan'ny tokantrano.

Mitsinjara toy izao manaraka izao ireo mponina araka ny sokajin-taona:

Tabilao 4 : Isan'ny mponina, mitsinjara araka ny taona

Ilot	Isan'ny mponina				Totaly
	0-17 taona		+ de 18 an		
	H	F	H	F	
Ampamoloana	69	65	70	67	271
Antanety	70	70	70	67	277
Fianarantsoa	68	68	70	66	272
Amboasary	40	35	39	26	140
TOTAL	247	238	249	226	960

(Loharano: Fanadihadiana ifotony, Sefo Fokontany, 2022)

Hatramin'ny 05 oktobra 2001 niforonan'ny VOI LOVAMAHAFINARITRA dia efa napetrak'izy ireo ho izay rehetra monina ara-dalana ao anatin'ny Fokontany ka ampy taona no afaka ho mpikambana ao anatin'ny VOI. Miisa 475 ny mpikambana nandritra ny taona 2022.

III.2 Ny fiveloman'ny mponina

100% mponina eto amin'ny Fokontany ANTANETY EST dia mivelona amin'ny fambolena sy ny fiompiana avokoa.

Ankohatra ny maha tantsaha dia misy ihany koa ireo manao asa-tanana sy mivarotra ary miasa birao (Mpampianatra, Sefo Fokontany, mpitsabo, sns.). Fanamboarana tady avy amin'ny taretra no asa-tanana misongadina ao anatin'ny Fokontany. Tsy natao ho asa fivelomana fa natao ho asa an-tselika ihany hanampiana ny fidiram-bola ao an-tokantrano ny asa-tanana.

Mikasika ny vokatra azo avy amin'ny ala Tapia kosa indray dia ny voatapia no anisan'ny vokatra mampidi-bola kely ho an'ny mponina mandritra ny fahavokarany. Ny holatra sy ny vahona ihany koa dia anisan'ny vokatra azo ampidiram-bola tsara saingy efa vitsy.

❖ Fambolena

Ny fambolem-bary, ny katsaka, ny voly mangahazo ary ny voly vomanga no betsaka mpanao indrindra amin'ny fambolena ataon'ny mponina. Ankohatra ireo dia mamboly legioma isakan-karazany ihany koa izy ireo. Ny olana lehibe manoloana ny fambolena dia:

- ny tsy fifehezan'ny mponina ireo teknika maoderina;
- ny fahalafosan'ny zezika;
- ny aretina sy ny bibikely.

Tsy misy teknisiana manara-maso akaiky ny asa fambolena. Lafo ny masokarena amin'ny famokarana kanefa dia ireo mpividy avy any an-drenivohitra no mifehy ny vidiny. Tsy misy tsena ao anatin'ny Fokontany sy amin'ireo Fokontany manodidina fa any Imerintsiatosika rehefa Alarobia ary any Arivonimamo rehefa Zoma no hivarotana ireo vokatra.

Tabilao 5 : Tahirin-kevitra ara-pambolena

Karazany	Tahan'ny mponina manao azy	Toerana	Vokatra (kg/tokantrano/taona)	Fanamarihana
Vary	100%	Ilot rehetra	500	Atao sakafo sy amidy
Katsaka	100%	Ilot rehetra	Tsy fantatra	Atao sakafo sy amidy
Vomanga	100%	Ilot rehetra	Tsy fantatra	Atao sakafo
Mangahazo	100%	Ilot rehetra	Tsy fantatra	Atao sakafo sy amidy
Voatabia	30%	Ilot rehetra	Tsy fantatra	Amidy
Haricot-vert	70%	Ilot rehetra	Tsy fantatra	Amidy amin'ny Lecofruit
Anana	60%	Ilot rehetra	Tsy fantatra	Atao sakafo sy amidy

(Loharano: Fanadihadiana ifotony, ONG SAHA septambra 2022)

❖ Fiompiana

Ny fiompiana omby no manan-danja indrindra ho an'ny mponina ary saika manana avokoa ny 95%. Ny omby dia manampy amin'ny fiasana tany sy amin'ny asa fitanterana (sarety) ary akana zezika ihany koa ampiasaina amin'ny fambolena. Ny fiompiana akoho kosa no tena be mpanao indrindra satria mora ny masonkarena nefa mamony rehetra sendra andro sarotra. Ny mponina rehetra dia manana akoho avokoa fa ny isany no tsy mitovy. Ankohatra izany dia mitana toerana ambony ihany koa ny fiompiana kisoa, satria ny 60%-n'ny mponina dia manao azy avokoa ary atao ho petra-bola mba hitsinjovana ny vody andro merika sy hakana zezika.

Misy ihany koa ny miompy vorona (gana sy gisa ary dokotra) saingy vitsy dia vitsy izy ireo manerana ny Fokontany. Ireo karazana biby fiompy ireo dia atao sakafo sy amidy.

Toy izao manaraka izao ny antsipirihany momba ny fiompiana:

Tabilao 6 : Tahirin-kevitra ara-piompiana

Karazany	Salan'isa ananan'ny tokantrano iray	Toerana	% mponina manao azy	Ny ampiasaina azy
Omby	2	Fokontany manontolo	95%	Asa tany, fitanterana, akana zezika
Kisoa	1	Fokontany manontolo	60%	Tahiry, akana zezika
Akoho	5	Fokontany manontolo	100%	Hanina, amidy
Vorona (Gisa, gana, dokotra)	5	Fianarantsoa, Ampamoloana	5%	Hanina, amidy, akana zezika

(Loharano: Fanadihadiana ny Sefo Fokontany, ONG SAHA septambra 2022)

Mbola olana eo amin'ny fiompiana ireo aretina maro samihafa toy ny: Barika (akoho), sy ny aretin-kisoa sy ny omby ary ny fahalaviran'ny toerana misy mpitsabo sy misy fanafody azo vidina. Manahirana ny mponina ihany koa ny famelomana azy ireo satria lafo ny vidin'ny sakafo.

❖ Fampiasana ny ala

Toy izao hita amin'ny fafana manaraka izao ny fampiasan'ny mponina ny vokatra any anaty ala sy ao anatin'ny faritra:

Tabilao 7 : Fampiasan'ny mponina ny vokatra anaty faritra

Karazany	Fampiasana azy	Fanamarihana
Hazo Tapia	Hazo maty atao kitay	
Hazo hafa	Atao kitay na atao arina (charbon)	Hazo novolena
Voatapia	Hanina sy amidy	
Landy	Hanaovana kofehy (fil: amidy amin'ny mpanao lamba landy)	Zara raha misy
Bokana	Hanina sy amidy	
Raokandro	Hitsaboana ireo aretina mateti-pitranga Amidy (anadraisoa)	Samy mitsabo ny marariny ny isan-tokantrano Any Imerintsiatosika
Vahona	Atao fanafody	Azo atao fampidiram-bola fa efa vitsy
Bozaka	Anaovana rary sy hanafoana trano	
Taretra	Amidy na avadika ho tady	Tady: ampiasaina eo an-toerana sy amidy
Bararata	Tao-trano sy fefy	
Holatra	Hanina sy amidy	
Biby dia	Hazaina atao sakafo	Vorona, kary, trandraka, sns...

(Loharano: Fanadihadiana ifotony, ONG SAHA septambra 2022)

Ny doro-tanety no tena manimba ny ala.

❖ Hafa

Momba ny asa-tanana dia 20%-n'ny mponina (tokantrano) no misehatra amin'ny fanamboarana tady avy amin'ny taretra, misy ny ampiasaina ary misy ny amidy (misy mpanangona eny an-toerana), ankohatra izay dia misy ihany koa ny mpanao biriky saingy tsy fantatra mazava ny antotanisa mahakasika azy. Efa misy ihany koa ny misehatra amin'ny fanamboarana fatana mikajy ny tontolo iainana ary efa manomboka mirobobobo tokoa izany (toerana iray ao amin'ny ilot Antanety Est).

Ahitana mpivarotra (« epicerie ») sivy (09) ihany koa manerana ny Fokontany ka saika kojakoja madinika ilain'ny mponina andavanandro (toy ny : labozia, sira, menaka, savony, biscuit sy bonbon, sns...) ihany no hita amin'izy ireo.

V.3. Rafitra mpanampy:

Maromaro ireo rafitra mpanampy nitondra fampandrosoana teo anivon'ny Fokontany.

Tabilao 8 : Ireo rafitra mpanampy

Rafitra mpanampy	Taona	Fanampiana nataony
FDP	1996	Tontolo iainana
FIKRIFAMA	1994	Rano fisotro madio
Agrisud	2011	Fambolena ara-teknika (legioma)
FAFY (secaline)	2019	Miahy ny vehivavy sy ny zaza
AVSF (projet Mihary)	2017	Fampiofanana (voly legioma), fanamboarana lakandrano
PROTANA	2014-2020	Fampiofanana fiompiana akoho gasy sy legioma
PNUD	2021	Famatsiana fitaovam-pambolena madinika
PAGLI	2021	Fitarihan-drano fisotro madio
Afiberia	2018	Fambolenkazo
OSDRM	Tsy tadidy	Miahy ny vehivavy sy ny zaza
SAHA	2001	Fananganana VOI

(Loharano: Fanadihadiana ifotony, ONG SAHA septambra 2022)

IV. Fitsinjarana ny faritr'ala isaky ny sokajim-pampiasana

IV.1 Toetoetry ny ala

Araka ny toetoetrany dia azo zaraina telo (03) ny ala Tapia hita ao anatin'ny faritra. Ao ireo ala mbola hita fa matevina, ao koa ireo antoniny ary misy kosa ireo ala izay efa manify.

Tamin'ny alalan'ny fanisana (inventaire) no nahafahana namaritra izany.


Ireto avy izy ireo:

Tabilao 9 : Anarany sy velarany ary toetoetr'ireo ala

<i>Faritr'ala</i>	<i>Toetry ny Ala Tapia</i>	<i>Velarany (ha)</i>	<i>Toetry ny Ala Tapia</i>
Analavodivody	Manify	11,15	- Ala simbasimba ny doro-tanety (fanitarana ny tany hambolena, afo tsy voafehy)
Andoharano	Manify	3,72	- Ahitana hazo vaventy fa vitsy - Efa vitsy ihany ireo solofon-kazo - Isan-ny hazo hita ao: 223 fototra / ha - Hadirin'ny hazo hita ao: 11,48 m3/ha
Totaly Manify		14,87	
Amboara	Antonony	4,27	- Ala azo lazaina fa mbola tsara
Ambohidray	Antonony	12,16	- Vitsy ny hazo lehibe
Ambohimiadana	Antonony	1,74	- Ahitana solofon-kazo maro
Antanetibe (Antaibe)	Antonony	6,77	- Isan-ny hazo hita ao: 408 fototra / ha - Hadirin'ny hazo hita ao: 27,72 m3/ha
Ramaroanaka	Antonony	13,82	
Totaly Antonony		38,74	
Antsahavory	Matevina	7,56	- Ala azo lazaina fa mbola tsara - Tsy dia ahitana hazo lehibe - Ahitana solofon-kazo maro - Isan-ny hazo hita ao: 460 fototra / ha - Hadirin'ny hazo hita ao: 104,17 m3/ha
Totaly matevina		7,56	
TOTALY		61,17	

(Loharano: Famakafakana ny vokatra ny Fanisana, fanadihadiana teny ifotony – ONG SAHA, 2022)

Sarin-tany 4 : Fanehoana ny toetotr'ireo ala afindra fitantanana



IV.2 Sokajim-paritra

Nosokajina toy izao manaraka izao araka ny tantom-pitantana ireo faritr'ala tantanan'ny VOI.

Tabilao 10 : Fisokajiana ireo faritr'ala tapia araka ny tanjom-pitantana

Faritr'ala	Tantom-pitantana	Velarany
Amboara	Arovana tanteraka	4,27
Totaly Faritra arovana tanteraka		4,27
Antanetibe (Antaibe)	Antevenina	6,77
Totaly Faritra Antevenina		6,77
Ambohidray	Arovana	12,16
Ambohimiadana	Arovana	1,74
Ramaroanaka	Arovana	13,82
Analavodivody	Arovana	11,15
Andoharano	Arovana	3,72
Totaly Faritra Arovana		42,58
Antsahavory	Fampiasana maharitra	7,56
Totaly Fampiasana maharitra		7,56
Totaly		61,17

FANAMARIHANA HO AN'NY ALA TAPIA REHETRA

“Ny ala na hazo tapia rehetra ao anatin'ny faritra afindra fitantanana dia faritra arovana avokoa.”

- Tsy maintsy esorina ny kesika sy ny kininina na kely na lehibe;
- Tsy azo atao ny misoro-pako;
- Tsy azo atao ny manao fatana arina.


Toy izao manaraka amin'ny tabilao ambany izao kosa ny fomba fampiasana azy

Tabilao 11 : Fisokajiana ireo faritra araka ny tanjom-pitantanana

<i>Tanjom-pitantanana</i>	<i>Fampiasana azy</i>	<i>Rafim-pitantanana apetraka</i>
Faritra fampiasana maharitra	<p><u>Tsy azo atao</u> Manapaka hazo tapia lena Manapaka karazan-kazo rehetra tsy nazahoana alalana Mamboly hazo hafa ankoatra ny tapia</p> <p><u>Azo atao</u> Fiompiana landy, fitrandrahana vokatry ny ala hafa (PFNL) Zo nentim-paharazana: hazo maty, holatra, bozaka, raokandro, voatapia, saroy, bokana, vahona, tantely dia (fa manaja ny “fitrandrahana” iraisana, ohatra: fiompiana landy)</p>	Polisin’ala na Vaomiera isam-paritra Komity mpitantana
Faritra atevenina	<p><u>Tsy azo atao</u> Manapaka hazo tapia lena Manapaka karazan-kazo rehetra tsy nazahoana alalana Mamboly hazo hafa ankoatra ny tapia</p> <p><u>Azo atao</u> Fambolena Tapia Zo nentim-paharazana: hazo maty, holatra, bozaka, raokandro, voatapia, saroy, bokana, tantely dia</p>	Polisin’ala na Vaomiera isam-paritra Komity mpitantana
Faritra arovana	<p><u>Tsy azo atao</u> Manapaka hazo tapia lena Manapaka karazan-kazo rehetra tsy nazahoana alalana Mamboly hazo</p> <p><u>Azo atao</u> Zo nentim-paharazana: hazo maty, holatra, bozaka, raokandro, voatapia, saroy, bokana tantely dia</p>	Polisin’ala na Vaomiera isam-paritra Komity mpitantana
Faritra arovana tanteraka	<p><u>Tsy azo atao</u> Manapaka hazo tapia lena Manapaka karazan-kazo rehetra tsy nazahoana alalana Mamboly hazo hafa ankoatra ny tapia Miditra ao aminy</p> <p><u>Azo atao</u> Fiarovana ny ala tapia</p>	Komity mpitantana Polisin’ala na Vaomiera isam-paritra
Faritra natao ambolena sy tsy voasokajy	<p><u>Tsy azo atao</u> Manitatra tanim-boly sy mandrehatra afo manamorona ny ala tapia</p> <p><u>Azo atao</u> Fambolena hazo Zo nentim-paharazana: hazo maty, bozaka, taretra, bararata, vika, sns ..., araka ny fahafahan’ny faritr’ala Manatsara ny teknika fambolena mba hampitomboana ny vokatra miakatra</p>	Komity mpitantana Polisin’ala na Vaomiera isam-paritra

(Loharano: Fivoriana fanadihadiana ny fampiasana sy ny fitantanana ireo vondron’ala – ONG SAHA, 2022)

Sarin-tany 5 : Fanehoana ny drafi-panajariana ny faritra afindra fitantanana



V. Fitsipika amin'ny ankapobeny

Toy izao manaraka izao ny fitsipika ankapobeny mifehy ireo vondron'ala voalaza etsy ambony:

- Mba hampirindra ny fitantanana dia tsy maintsy hajaina ny fitsinjarana ny faritra ato anatin'ny drafy-panajariana sy fitantanana;
- Tsy maintsy misy fandaminana ny fampiasana ny zo netimpaharazana;
- Tsy azo atao ny manao tevy ala ao anatin'ny faritra tantanina;
- Ny hazo maina dia natokana ho ampiasaina amin'ny filàna andavanandro ary tsy azo amidy na atao fitadiavam-bola.

VI. Fitsipika hanajariana sy hitantanana sy fizaram-paritra tsirairay sy ny vokatra ao aminy

VI.1 Mikasika ny fampiharana ny zo nentim-paharazana.

Araka ny fahazarana ara-piaraha-monina misy sy ny toetoetry ny ala ankehitriny, dia noferana ho toy izao manaraka izao ireo zo nentim-paharazana momba fampiasana ny ala eto amin'ny faritra tantanan'ny VOI:

- Ny fototra Ala Tapia lena rehetra dia tsy azo tapahina ao anatin'ny ivelan'ny ala;
- Ny Ala Tapia rehetra dia azo hanaovana ny zo nentim-paharazana voalaza ao amin'ity takila ambany ity izay mamaritra ihany koa ny fangatahana fazahoan-dalana na tsia mahakasika ny fitrandrahana;
- Azo hampiharana ny zo nentim-paharazana avokoa ny faritra rehetra ankohatra ny faritra arovana tanteraka, fa miankina amin'ny fepetra voarakitra ato anatin'ity drafy-panajariana ity;
- Ny mpikambana te hampiasa ny zony dia tsy maintsy mandefa fangatahana mialoha any amin'ny kaomity mpitantana. Faritana mazava ny antony sy ny zavatra angatahana;
- Ny karazam-biby dia azo hazaina fa kosa manaraka ny fepetra momba ny fihazana sy ny fanajana ny fe-potoana;
- Ny fampiharana ny zo netim-paharazana dia ferana araka ny fahafahan'ny vokatra ary omena laharam-pahamehana ireo mpikambana mavitrika;
 - Ny atao hoe mpikambana mavitrika dia ireo mpikambana:
 - Mahaloha latsakemboka ara-dalana;
 - Tonga mamonjy ny fivoriana ara-potoana;
 - Tsy tapaka amin'ny asa iraisan'ny VOI;
 - Na raha misy tsy fahafahana ka tena maripototra ny antony, dia mandefa filazana mialoha mifanaraka amin'ny Fitsipika anaty sy ny Dina
 - Ny tombony azon'ny mpikambana mavitrika manokana dia faritan'ny fikambanana isan-taona mandritra ny fivoriambe. Miankina amin'ny habetsakin'ny vokatra azo alaina isan-taona izany.
- Raha olona ivelan'ny VOI kosa dia mandoa sarany amin'ny VOI araka ny Dina.
- Iharan'ny sazy izay mampihatra ny zo nentim-paharazana raha miseho ireto tranga ireto.

- Olona mpikambana amin'ny VOI tsy nangataka alalana arakaraka ny vokatra trandrahina hita eo amin'ny tabilao eo ambany;
- Olona tsy mpikambana ka maka ireo vokatra nefa tsy nahazo alalana.
- Tsy azo atao ny mivarotra ny zo netimpaharazana na ao anatiny na any ivelan'ny faritra. Izay mandika izany dia ampiharana ny Dina avy hatrany;
- Ny Dina eny ampelan-tanan'ny VOI no milazalaza ireo saran'ny sazy aloa arakaraka ny vokatra alaina.

Tabilao 12 : Fepetra mikasika ny fampiharana ny zo nentim-paharazana

Karazam-bokatra	Karazan-kazo, zava-maniry voakasika	Fangatahana fahazoan--dalana amin'ny komity mpitantana
Hazo maty	Tapia, hazo hafa	Eny
Hazo lena	Kesika, Kininina novolena sy ny sisa	Eny
Holatra	Holatra	Tsia
Bozaka	Haravola, vandrana, koropotsy	Eny
Raokandro na ravi-maintso	Zamborozano, tsingila, hatsikana, horokely, vahona	Tsia
Vokatra hafa	Taretra, ampangabe, hazon-drano, herana, saonjomanga,	Eny Manao fifanarahana amin'ny tompony raha eny antanin'olona
Voankazo	Tapia (voan-tapia)	Tsia
Biby isan-karazany	Bokana, Mavokely, saroy, soherina, tantely dia, trandraka, sokona	Tsia

VI.2 Mikasika ny faritra fampiasana maharitra

Ireo faritra matevina azo trandrahana hampiroboroboana ny fiompiana landy sy izay mahakasika azy, ny fiompiana tantely, ny vokatra hafa toy ny vahona, ny taretra, sns... ary ireo vokatra ny ala hafa (PFNL) no resahina ao anatin'ity faritra ity. Rehefa miroborobo izy ireo dia azon'ny VOI atao ho fidiram-bola.

Raha amidy mivoaka ny faritra anefa ny vokatra dia manao fangatahana amin'ny VOI sy ny Sampandraharan'ny ala ary mandoa saram-pitantanana sy tamberim-bidy amin'ny Kaominina ny mpanangona.

Ireto avy ny azo atao sy tsy azo atao ao amin'io faritra io:

Tsy azo atao

- Manapaka hazo tapia lena
- Manapaka karazan-kazo rehetra tsy nazahoana alalana
- Mamboly hazo hafa ankoatra ny tapia

Azo atao

- **Fitrandrahana harena voajanahary azo avaozina samihafa (PFNL);**
- Zo nentim-paharazana: hazo maty, holatra, bozaka, raokandro, voatapia, saroy, bokana tantely dia (fa manaja ny “fitrandrahana” iraisana, ohatra: fiompiana landy, sns...).

VI.3 Mikasika ny faritra atevenina sy ampiharana ny zo nentim-paharazana

Ireo faritra izay nosokajiana ho manana Ala Tapia efa andalam-pahasimbana na nosokajiana ho manify nandritra ny fitsirihana natao. Mbola azo arenina tsara ihany koa izy io.

Ho fanarenana azy ireo dia sosohana zanaka Tapia ireo faritra ireo ka ny mpikambana ao amin'ny VOI no manao izany amin'ny fotoana mahamety azy. Ireto avy ny azo atao sy tsy azo atao ao amin'io faritra io.

Tsy azo atao

- Manapaka hazo tapia lena
- Manapaka karazan-kazo rehetra tsy nazahoana alalana
- Mamboly karan-kazo hafa ao anatiny sy manodidina azy
- Misoro-pako ao anaty ala Tapia

Azo atao

- Fambolena Tapia
- Zo nentim-paharazana: hazo maty, holatra, bozaka, raokandro, voatapia, saroy, bokana tantely araky ny fahafahan'ny faritr'ala. Voafetra kosa ny fangalana vokatra ireo satria efa manify ny ala.

VI.4 Mikasika ny faritra arovana sy ampiharana ny zo nentim-paharazana

Ireo faritra izay nosokajiana ho efa simba nandritra ny fitsirihana. Mila averina ho ala amin'ny alalan'ny fiharovana azy ireo faritr'ala ireo mba hia-matevina hatrany hatrany ka hafahana misitraka ireo vokatra izay hita amin'ny Ala Tapia amin'ny alalan'ny fampiharana ny zo nentim-paharazana.

Tsy azo atao

- Manapaka hazo tapia lena
- Manapaka karazan-kazo rehetra tsy nazahoana alalana
- Mamboly hazo ao anatiny sy manodidina azy
- Misoro-pako ao anaty ala Tapia

Azo atao

- Zo nentim-paharazana: hazo maty, holatra, bozaka, raokandro, voatapia, saroy, bokana tantely araky ny fahafahan'ny faritr'ala. Voafetra ny fangalana ireo vokatra ireo satria efa manify ny ala.

VI.5 Mikasika ny faritra arovana tanteraka

Ireo faritra izay nosokajiana ho mbola manana Ala Tapia tsara nandritra ny fitsiriana natao no voafaritra ho faritra arovana tanteraka.

Tsy azo atao

- Manapaka hazo tapia lena
- Manapaka karazan-kazo rehetra tsy nazahoana alalana
- Mamboly karan-kazo hafa ao anatiny sy manodidina azy
- Misoro-pako ao anaty ala Tapia

Azo atao

- Miaro ny ala.

VI.6 Mikasika ny faritra natao ambolena sy tsy voasokajy

Ireo faritra izay nambolen'ny olona vary sy vokatra maro samy hafa no tiana ambara eto. Anisan'ny tsindry lehibe mianjady amin'ny Ala Tapia ny fanitarana ny faritra fambolena indrindra ny eny antanety.

Tsy azo atao

- Manitatra ny tanim-boly manamorona ala tapia
- Doro-tanety na fandroana fako tsy nahazoana alalana

Azo atao

- Fambolena Tapia sy karazan-kazo samy hafa
- Manatsara ny teknika fambolena mba hampitomboana ny vokatra miakatra

VII. Andraikitr'ireo ankolafin-kery voakasika (mifanampy amin'ny bokin'andraikitra)

VII.1 Ny Fari-piadiam-paritry ny tontolo iainana sy ny fandrosoana lovain-jafy.

Andraikitra ny Ben'ny ala ny:

- Manofana ny VOI momba ny lalàna mifehy ny ala sy ny teknika maro samihafa mahakasika ny fitantanana sy fitrandrahana maharitra ny vokatra ny ala, fanomezana fahazoan-dàlana, ny fambolan-kazo manara-penitra, sns...;
- Manome fahazoan-dàlana hikapa hazo novolena ao aorian'ny fanamarinana ataon'ny VOI;
- Manampy amin'ny famahana ireo olana samihafa raha tsy voavahan'ny VOI sy ny Kaominina;
- Mampihatra ireo lalàna velona rehefa misy manao fahadisoana ka tsy manaiky ampiharana Dina ilay olona na koa tsy voasahan'ny Dina ny heloka nataony;
- Manaramaso ireo asa vita araka ny voalazan'ny drafy-panajariana.

VII.2 Ny Kaominina

Andraikitra ny Kaominina:

- Ny Kaominina no mpiahy voalohany ny VOI misahana ny fitantanana ny harena voajanahary azo havaozina ao anatin'ny toerana hiadidiany;
- Ny Kaominina no mankatò ny Dina izay volavolain'ny VOI ary manampy azy amin'ny fampiharana izany eny an-toerana;
- Ny manaramaso sy mandamina ny olana misy ateraky ny fitantanana ny harena voajanahary azo havaozina.

VII.3 Ny VOI LOVAMAHAFINARITRA

Mba ho lavorary ny fanatanterahana ity drafy-panajariana sy fitantanana ity dia ireto voatanisa manaraka ireto ny tokony ho ataon'ny VOI LOVAMAHAFINARITRA isan-taona mandritra ny folo taona.

VII.3.1 Asa fiofanana

Noho ny antony samihafa dia maro ireo zavatra mbola tsy nahazatra ny VOI nefa takiana aminy ao anatin'ny fifanarahana famindram-pitantanana, noho izany dia ilaina ny fanamafisana ny fahaizama-naon'izy ireo amin'ny alalan'ny fampiofanana azy.

❖ Fiofanana amin'ny fitantan-draharaha

Mba hisian'ny fahaiza-manao sy fahaiza-mitantana ho an'ny fikambanana dia ilaina ny fiofanan'ireo komity mpitantana ao amin'ny VOI eo amin'ny fitantanandraharaha ankapobeny (fitanana an-tsoratra, taratasim-pifandraisana, fanaovana tatitra, fitantanam-bola, fanaraha-maso ny ala, sns.).

❖ Fiofanana amin'ny fambolen-kazo

Ilaina ny fanofanana ny mpikambana rehetra ao amin'ny VOI amin'ny teknika fambolena hazo manara-penitra mba hanatsarana ny haitao sy ny vokatra. Ny teknisianina no hampianatra azy ireo io teknika io ka manomboka hatrany amin'ny fomba fakana zana-kazo anaty ala ka hatrany amin'ny fomba fikolokoloana ny hazo nambolena no hiofananana amin'izany.

❖ Fiofanana momba ny fanapahana hazo

Ilain'ny mpikambana rehetra ny fiofanana mikasika ny fomba fanapahana hazo (hazo novolena natokana hampiasaina ihany no voaresaka eto) mba hampihena ny fandaniahana be fahatany ny ala sy mba hahatsara ny tsiriny. Ny teknisianina ao amin'ny sampandraharaha miadidy ny Ala miaraka amin'ny mpiara-miombon'antoka hafa no tompon'andraikitra amin'ny fampianarana io teknika io.

❖ Fiofanana hafa mikasika ny asa fampandrosoana: fiompiana, voly manara-penitra, fanamboarana zezika (compost), sns...

Mba ho fampandrosoana ny fari-piveloman'ny mpikambana ao amin'ny VOI sy ahafahany manajary, manatsara ary mitantana amin'ny fomba maharitra ny ala sy ny vokatra ao aminy dia ilainy ihany koa ny miofana mikasika ny asa fampandrosoana isankarazany toy ny fiompiana trondro, tantely, voly vary maro anaka, fanamboarana zezi-pahitra, sns., araky ny filan'izy ireo. Ny tompon'andraikitra voalohany amin'ny fanatanterahana izany fiofanana izany dia ireo mpitantisoroka na mpiara-miombon'antoka.

VII.3.2 Asa fanentanana sy fampahafantarana ny famindram-pitantanana izay natao

❖ Fanentanana sy fampahafantarana ary fanazavana ny amin'ny zo sy andraikitra ny VOI ary ireo fitaovam-pitantanana samihafa amin'ny mpikambana VOI rehetra

Anjaran'ny Komity mpitantana ny manao asa fanentanana sy fampahafantarana ny mpikambana rehetra ao amin'ny VOI ny zo sy andraikitra miandry azy ireo ary koa fanazavana sy fampatsiahivana ireo fitaovam-pitantanana rehetra (fifanekena, bokin'andraikitra, Dina, drafi-panajariana) ampiasaina amin'izany. Izany dia ho tanterahina amin'ny alalan'ny fivoriamben'ny mpikambana.

❖ Fampahafantarana ny Fokontany hafa ivelany ny amin'ny famindram-pitantanana natao

Mba aha-tomombana ny fampiharana ny famindram-pitantanana izay natao, dia tokony ho fantaty ny rehetra ny fisian'ny famindram-pitantanana izay natao sy ireo fepetra rehetra takian'izany. Noho izany dia ny VOI manontolo no tompon'andraikitra, miaraka amin'ny Kaomina eo amin'ny fanentanana ny faritra manodidina mikasika ny famindram-pitantanana izay mihatra, ny fepetra tsy maintsy arahina sy Dina ary ny drafi-panajariana. Izany rehetra izany dia ho tanterahina amin'ny alalan'ny fitetezana ireo Fokontany hafa ireo.

VII.3.3 Asa fanajariana

❖ Fanatevenana ny atiala

Ilaina ny asa fanatevenana mba hamerenana amin'ny laoniny ireo ala simba ka ny mpikambana ao amin'ny VOI no mifarimbona manao izany asa izany. Ny asa ho atao dia soritana mazava ao anatin'ny Drafitr'asa isan-taona araka izay fahafan'ny VOI.

❖ Fambolen-kazo

Anisan'ny asan'ny VOI ny manatanteraka voly hazo iraisana sy isam-batan'olona. Ny fanatanterahana izany dia faritana ao amin'ny drafitr'asa isan-taona. Faritana ny toerana sy ny velan'ny tany ary ny isan'ny zana-kazo ho volena mandritra ny taona manaraka ho an'ny volin'ny fikambanana ary ho an'ny isan-tokantrano kosa dia faritana ao anatin'ny drafitr'asa ihany koa ny isan'ny zana-kazo ho zaraina.

❖ Fiadiana amin'ny fanitatra tanimboly any anaty sy manodidina ny ala tapia

Na dia tsy tena tsindry mahazo ny ala tapia ho an'ny VOI LOVAMAHAFINARITRA aza ny fanitatra tanimboly, dia asa miandry azy hatrany ny ady amin'ny teviaala. Koa anjarany ny manao asa fanentanana sy ny fampafantarana ireo lalàna misy sy mifandraika amin'ny teviaala ary indrindra indrindra ireo voka-dratsin'izany.

❖ Fiadiana sy fiarovana amin'ny afo

Mba hisorohana ny doro-tanety ihany koa dia hanao aro afo manodidina ireo faritra atahorana toy ireo toerana fihavin'ny afo isan-taona sy manodidina ireo toerana tiana arovana toy ny faritra fambolan-kazo sy ireo vondron'ala nafindra fitantanana ny VOI.

❖ Fiarovana ny tanety sy ny tanim-boly

Fanatevenana ny aro-riaka, fiarovana ny lavaka tsy hitatra, fiarovana ny nofon-tany.

VII.3.4 Asa fanaraha-maso

❖ Fitsirihana sy fisafoana ny faritr'ala ho tantanina

Na dia efa misy aza ireo polisin'ala izay manatanteraka asa fisafoana ao anatin'ny faritra, ny mpikambana rehetra ao amin'ny VOI dia tompon'andraikitra ihany koa amin'ny fanaraha-maso ny fampiharana ny zo nentim-paharazana izay mifanaraka amin'ity drafi-panajariana ity. Izany no atao dia ny mba hisorohana ny fitrandrahana baranahiny izay mety hamotika haingana ny faritra.

❖ Fanaraha-maso ny doro-tanety

Amin'ny fotoanan'ny doro tanety dia araha-maso tsara ny faritr'ala ary vonoina avy hatrany ny afo raha misy.

❖ Fampiharana ny Dina

Mba tsy ho zava-poana ny fanaraha-maso dia hisy famaizana an'ireo izay tratra manao fahadisoana amin'ny alalan'ny fampiharana ny Dina. Koa satria efa misy ny Dinam-paritra, dia io Dinam-paritra no ampiasain'ny VOI ho lalàna sy fifampihezana ao anatin'ny faritra afidra fitantanana aminy.

VII.3.5 Asa fifandraisana amin'ny any ivelany

❖ Fanaovana tatitra amin'ny Kaominina sy ny Sampandraharahan'ny ala,

Tsy maintsy mifandray amin'ny any ivelany ny VOI mba ahafahan'ireo mpiara-miombon'antoka hafa manampy sy manohana azy. Mba hahalavorary izany dia manao tatitra isam-bolana any amin'ny Kaomina, ny Ben'ny ala ireo Komity mpitantana ao amin'ny VOI.

❖ Fiaraha-miasa amin'ny VOI hafa

Tsara raha mifandray amin'ireo VOI hafa efa manana traikefa ny VOI LOVAMAHAFINARITRA ary misintona lesona ny amin'izay nety sy ny tsy nety teo amin'ny fiainan'ireo VOI hafa ireo sy ny amin'izay fepetra noraisiny manoloana ireo tranga sy ireo olana maro samihafa mikasika ny fitondrana ny fikambanana sy ny fitantanana mirindra ny harena voajanahary. Izany dia tokony hataon'ny birao mba entina hanatsarana sy hampandeha araka ny tokony ho izy ny fitantanana ireo vondron'ala.

❖ Fitadiavana mpanohana amin'ireo tetik'asa fampandrosoana kasaina hatao

Tokony hampafantarina ireo mpitantsoroka sy ireo rafitra mpanampy ny famindram-pitantanana izay natao afahana mijery izay fiaraha-miasa azo tanterahina hanatsarana sy aha-tomombana ny famindram-pitantanana sy ny fitadiavana mpanohana amin'ireo tetik'asa fampandrosoana kasaina hatao.

VII.3.6 Fizohiana sy tomban'ezaka

Ho fampiharana sy fandrindrana ireo asa rehetra ireo dia tsy maintsy manao lamin'asa sy tomban'ezaka isan-taona ny VOI. Ny komity mpitantana miaraka amin'ny Ben'ny ala no manao ny fizohiana atao mikasika ny habetsaky ny vokatry nampiasaina sy manao ny tomban'ezaky ny asa sy ny dingana rehetra vita. Amin'ny alalan'ny fivoriambe no hanatanterahana izany isan-taona.

Ny sampanraharaha miadidy ny Ala miaraka amin'ny Kaominina no manao ny tomban'ezaka isaky ny dimy taona.

VIII. Ny drafitr'asa isan-taona

Toy izao ny drafitrasa ao anatin'ny dimy (5) taona voalohany ho an'ny VOI.

Tabilao 13 : Ny drafitr'asa mandritra ny telo taona ho an'ny VOI

Paik'ady	Asa atao	Zanak'asa	Tompon'andraikitra	Taona anatanterahana azy					Fotoana hanatontosana azy	Mari-pandrefesana
				1	2	3	4	5		
Fanamafisana ny fahaiza-manaon'ny VOI	Fampiofanana ny VOI	Fiofanana amin'ny fitantanana-draharaha	Komity mpitantana ny VOI, Sampandraharaha miadidy ny Ala, Kaominina, Fokontany	x	x				Telo volana voalohany:	Isan'ny fiofanana atao sy ny fampiharana azy Karazan'ny fitaovam-pitantanana ananan'ny VOI
		Fiofanana amin'ny teknika fambolena-kazo any amin'ireo faritra hatevenina	Mpikambana rehetra, Sampandraharaha miadidy ny Ala	x	x	x	x	x	Akaiky ny fotoana fambolena-kazo	Isan'ny fiofanana omena sy ny mpiofana Isan'ny mpikambana mampihatra ny teknika manara-penitra
		Fiofanana momba ny fanampahana hazo (zo nentim-paharazana)	Komity mpitantana ny VOI, Sampandraharaha miadidy ny Ala	x					Aout sy Septambra Oktobra	Isan'ny fiofanana omena sy ny mpiofana Isan'ny mpikambana mampihatra ny teknika manara-penitra
		Fiofanana hafa mikasika ny asa fampandrosoana: fiompiana tantely, voly vary manara-penitra, fanamboarana zezika (compost), sns.	Mpikambana rehetra, Servisim-panjakana voakasika,	x	x	x	x	x	Araky ny filàna	Isan'ny fiofanana omena sy ny mpiofana Isan'ny mpikambana mampihatra ny teknika manara-penitra

Paik'ady	Asa atao	Zanak'asa	Tompon'andraikitra	Taona anatanterahana azy					Fotoana hanatontosana azy	Mari-pandrefesana
				1	2	3	4	5		
Fampahafantarana ny famindram-pitantanana izay natao	Asa fanentanana sy fampahafantarana ny mpikambana ny amin'ny zo aman'andraikiny sy ny amin'ireo fitaovam-pitantanana samihafa	Fivoriamben'ny mpikambana	Mpikambana rehetra, Komity mpitantana ny VOI, Sampandraharaha miadidy ny Ala,	x	x	x	x	x	Isaky ny volana Jona sy Desambra	Isan'ny mpikambana voantana isan-taona
	Fampahafantarana ny manodidina ny amin'ny famindram-pitantanana natao	Fitetezana ny Fokontany manodidina	Kaomina Komity mpitantana ny VOI Mpikambana VOI rehetra	x	x	x	x	x	Mandavan-taona	Isan'ny fivoriana fampahafantarana atao Isan'ny fitetezana tanana
Fanajariana ireo vondron'ala nafindra fitantanta	Fanatevenana ny atiala	Fanasosohana zanaka hazoala amin'ny ala arovana	Mpikambana VOI rehetra	x	x	x	x	x	Desambra hatramin'ny Febroary	Isan'ny zanakazo voavoly
	Ady amin'ny tevia	Fanaovana aro afo eo amin'ny toerana fambolen-kazo sy amin'izay toerana heverina fa fiavin'ny afo isan-taona	Mpikambana VOI rehetra	x	x	x	x	x	Aprily sy May	Refin'ny aro afo vita
		Fanentanana ny ady amin'ny tevia (lalàna misy, voka-dratsy)	Komity mpitantana ny VOI, Sampandraharaha miadidy ny Ala	x	x	x	x	x	Aprily	Tatitra fivoriana fanentanana natao Isan'ny olona tonga nanatrika ny fivoriana fanentanana
		Famonoana ny afo raha misy izany	Mpikambana VOI rehetra	x	x	x	x	x	Mandavan-taona	Isan'ny mpandray anjara Velaran'ny faritra may

Paik'ady	Asa atao	Zanak'asa	Tompon'andraikitra	Taona anatanterahana azy					Fotoana hanatontosana azy	Mari-pandrefesana
				1	2	3	4	5		
										Isan'ny afo voavono
Fanaraha-maso ny faritra tantanina	Fitsirihana sy fisafoana ireo faritr'ala tantanina	Fanaraha-maso ny fomba fampiharana ny zo nentim-paharazana	Polisin'ala, Mpikambana rehetra	x	x	x	x	x	Mandavan-taona	Isan'ny fitsirihana atao isan-taona
		Fanaraha-maso ny teviaala	Polisin'ala, Mpikambana rehetra	x	x	x	x	x	Mandavan-taona	Refin'ny aro afo isaky ny toerana fambolenkazo Isan'ny doro tanety voavono
	Fampiharana ny fitsipi-pifehezana	Famaizana ireo tratra manao fahadisoana	Komitin'ny fampiharana ny fitsipi-pifehezana Komity mpitantana ny VOI, Ray aman-dreny eo an-tanàna, Fokontany	x	x	x	x	x	Mandavan-taona	Isan'ny fandikandalàna nampiharana ny Fitsipi-pifehezana
Fifandraisan'ny VOI amin'ny any ivelany	Fanaovana tatitra any amin'ireo mpiaramiombon'antoka samihafa	Fanaovana tatitra any amin'ny Kaominina	Filoha sy mpitantsoatratry ny VOI	x	x	x	x	x	Isaky ny faran'ny volana	Isan'ny tatitra alefa any amin'ny Kaominina
		Fanaovana tatitra any amin'ny sampandraharahan'ny ala	Filoha sy mpitantsoatratry ny VOI	x	x	x	x	x	Isaky ny faran'ny volana	Isan'ny tatitra alefa any amin'ny sampandraharahan'ny ala
	Fiaraha-miasa amin'ny VOI hafa	Fifanakalozana amin'ireo VOI efa manana traik'efa tamin'ny famindram-pitantanana	Komity mpitantana ny VOI	x	x	x	x	x	Mandavan-taona	Isan'ny fiaraha-miasa Karazana fiaraha-miasa

Paik'ady	Asa atao	Zanak'asa	Tompon'andraikitra	Taona anatanterahana azy					Fotoana hanatontosana azy	Mari-pandrefesana
				1	2	3	4	5		
	Fitadiavana mpanohana amin'ireo tetik'asa fampandrosoana kasaina hatao	Fiaraha-miasa akaiky amin'ireo mpitantsoroka sy ireo rafitra mpanampy rehetra	Komity mpitantana ny VOI, Sampandraharaha miadidy ny Ala, Kaominina, Fokontany	x	x	x	x	x	Mandavan-taona	Isan'ny fangataham-piaraha-miasa natao Karazana fanohanana Fandraisan'anjaran'ny mpanohana
Fizohiana sy tomban'ezaka	Fizohiana mikasika ny habetsaky ny vokatra nampiasaina.	Fidinana eny an-toerana	Komity mpitantana ny VOI, Sampandraharaha miadidy ny Ala, Kaominina			x	x	x	Amin'ny faran'ny faharetan'ny famindram-pitantanana	Isan'ny fitsidihana atao Fitohizan'ny fifanekem-pamindram-pitantanana
	Fanaovana tomban'ezaka ny taom-pitantanana nodiavina	Fivorian'ny Komity mpitantana	Komity mpitantana ny VOI Sampandraharaha miadidy ny Ala, Kaominina	x	x	x	x	x	Desambra Tsy voafetra rehefa ilaina	Fitanana an-tsoratra fivoriana
		Fivoriam-be	Mpikambana VOI rehetra	x	x	x	x	x	Desambra, Jona	Fitanana an-tsoratra fivoriana Isan'ny mpivory
	Fanaovana lamin'asa ho an'ny taona manaraka	Fivorian'ny Birao	Komity mpitantana ny VOI, Sampandraharaha miadidy ny Ala, Kaominina	x	x	x	x	x	Oktobra-Novambra	Fitanana an-tsoratra fivoriana

IX. Fomba fampiasaina ity drafi-panajariana sy fitantanana ity

Ity Drafi-panajariana sy Fitantanana ny ala tapia ao ANTANETY EST ity dia natao indrindra ho tari-dalana maharitra hoan'izay rehetra te-hanao asa ao anatin'ireo vondron'ala nafindra fitantanana tamin'ny VOI LOVAMAHAFINARITRA:

- Ny VOI LOVAMAHAFINARITRA: nahazo ny fifanekem-pamindram-pitantanana avy amin'ny Sampandraharahan'ny Ala
- Ny Kaominina Arivonimamo II: mpiahy mivantana ilay VOI.
- Ny Fari-piadian'ny Tontolo Iainana sy ny Fandrosoana Lovain-jafy: mifanampy amin'ny VOI.

IX.1 Ho an'ny VOI LOVAMAHAFINARITRA

- Tsy maintsy manaja ireo fepetra rehetra voalazan'ny Drafi-panajariana ny V.O.I. Ny tsy fankatoavana izany dia mahatonga sazy omen'ny Foibem-paritry ny Tontolo Iainana sy ny Fandrosoana Lovainjafy izay mety hiafara hatramin'ny fanafoanana ny fifanekem-pamindram-pitantanana.
 - Ny tsy fampiharana Dina amin'ny olona manao fahadisoana, ny tsy fanaovana drafitr'asa isan-taona sy ny tsy fanatanterahana azy ary ny fisiana fanapahana hazo tapia tsy nandraisana andraikitra dia mitarika *fanomazana fampitandremana* ;
 - Ny fahazoana fampitandremana in-telo (03), fisiana fanaovana teviaala tsy nandraisana andraikitra ary ny fisiana doro-ala tsy nandraisana andraikitra dia mitarika *fampiantoana ny fifanekena*;
 - Ny fahazoana fampiantoana indroa (02) sy/na ny fisiana doro-ala tapia tsy nandraisana andraikitra dia mitarika *fanafoanana ny fifanekena*.
- Ny Filohan'ny VOI na izay olona tendreny no tompon'andraikitra amin'ny fikajiana ny dika mitovin'ity Drafi-panajariana sy Fitantanana ity.
- Tsy maintsy ampahafantarina ny mpikambana rehetra tsy ankanavaka ny vontoatin'ity Drafi-panajariana ity. Ny birao mpitantana ny VOI no tompon'andraikitra voalohany amin'izany. Azon'ny Birao atao ny maka toro-hevitra na fanampim-panazavana amin'ny lehiben'ny Sampandraharaha miadidy ny Ala, eo an-toerana izay niara- namolavola azy.
- Tsy azon'ny mpikambana atao ny manova na mandrava izay raketin'ity drafi-panajariana sy fitantanana ity.
- Tsy maintsy asehon'ny Birao an'izay Fikambanana na mpamatsy vola te-hanohana ny V.O.I amin'ireo tetik'asa fampandrosoana tiany atao ity Drafi-panajariana ity. Zon'ny V.O.I tanteraka ny mandà izay rehetra mety tetik'asa tian'ny mpanohana haroso ka mifanohitra amin'izay voalazan'ity Drafi-panajariana sy fitantanana ity.

IX.2 Ho an'ny Kaominina Arivonimamo II

- Amin'ny maha-vondrona mpiahy ny VOI LOVAMAHAFINARITRA azy dia zon'ny Kaominina Arivonimamo II ny mahafantatra tsara izay voarakitra ao amin'ity Drafi-panajariana sy Fitantanana ny vondron'ala sy ireo harena voajanahary azo havaozina ao ANTANETY EST ity.
- Ho fampandrosoana ny Kaominina dia, tokony ampidirina ao amin'ny drafi-pampandrosoana rehetra (PCD, SAC, sns) an'ny Kaominina izay voalazan'ny drafi-panajariana sy fitantanana, indrindra fa mahakasika ny tetik'asa fampandrosoana mandala ny Tontolo Iainana.
- Azon'ny Kaominina atao ny mamatsy vola na fitaovana ny V.O.I sy mampiseho ity Drafitra ity amin'ireo mila izany (Manam-pahefana, mpamatsy vola, mpikaroka...)
- Azon'ny Kaominina atao koa ny manao ity Drafitra ity ho modely fampandrosoana sy fikajiana ny harena voajanahary any amin'ny faritra hafa ao amin'ny Kaominina ka tsy mbola misy V.O.I

- Adidin'ny Kaominina ny mampahafantatra ny fisian'ity drafi-panadrariana ity ny amin'ireo Kaominina manodidina.

IX.3 Ho an'ny Mpanohana

- Izay Fikambanana na olon-tsotra te-hanohana ara-bola na ara-pitaovana ny VOI amin'ireo tetik'asa tiany hatao dia tsy maintsy manaja ireo fepetra sy toro-lalana voalazan'ity Drafi-panajariana ity; tsy maintsy mandrafitra Drafitr'asa isan-taona miaraka amin'ny V.O.I amin'izany.
- Afaka mijery sy mitrandrakaity drafitra ity miaraka amin'ny VOI sy ny Kaominina mpiahy.

IX.4 Ho an'ny Foibe iraisam-paritry ny Tontolo Iainana sy ny Fandrosoana Lovainjafy Itasy

- Zony tanteraka ny manafonana ny famindram-pitantanana raha toa ka voaporofa fa tsy nahatanteraka ny voalazan'ity Drafi-panajariana ity ny VOI. Ny fanatanterahana izany dia tsy maintsy mifanaraka amin'izay voalazan'ny lalàna.
- Mba hahalavorary ny fampiasana ity drafi-panajariana sy fitantanana ity dia anjara asan'ny Foibem-paritry ny Tontolo Iainana sy ny Fandrosoana Lovainjafy ny:
 - manoro ny fenitra sy ny didy aman-dalàna misy;
 - mitantsoroka sy mampihofana ara-teknika ny VOI,
 - mampihatra ny didy aman-dalàna sy ny fenitra,
 - manampy amin'ny fandinihana izay mivaona sy fisafidianana ny vahaolana mety ary manatanteraka ny asa.

Natao teto Antanety Est ny,

Ny Filohan'ny VOI LOVAMAHAFINARITRA

« Hita sy ankatoavina »

Ny Tale Iraisam-paritry ny Tontolo Iainana sy ny Fandrosoana Lovainjafy Itasy

BOKIN'ANDRAIKITRA

TOKO I : FAMARITANA ANKAPOBENY

Andininy voalohany: Ity bokin'andraikitra ity dia natao manokana ho fampiharana ny andininy faha-5 ao amin'ny lalàna laharana 96-025 tamin'ny 30 Septambra 1996 izay mikasika indrindra ny fitantanana eny an-toerana ny harena voajanahary azo havaozina izay voafaritra toy izao:

- Avaratra: Fokontany Antanetilava;
- Atsinanana: Fokontany Manerinerina;
- Atsimo: Fokontany Manankasina;
- Andrefana: Fokontany Ambohijatovo.

And-2: Ity bokin'Andraikitra ity dia mamaritra ny paika ankapobeny momba ny famindram-pitantanana ireo harena voajanahary azo havaozina ao amin'ny Fokontany ANTANETY EST, izay ifanaovan'ny Sampandraharaha Teknika miadidy ny ala sy ny Tontolo Iainana, sy ny Kaominina Ambanivohitra ARIVONIMAMO II, ary ny Vondron'Olona Ifotony (V.O.I): LOVAMAHAFINARITRA eto ANTANETY EST.

And-3: Ireto avy ireo olona manana zo sy andraikitra amin'ny fitantanana ny harena voajanahary ao amin'ny Fokontany ANTANETY EST, Kaominina Ambanivohitra Arivonimamo II:

- Ny mponina ao amin'ny Tanàna Antanety Est;
- Ny mponina ao amin'ny Tanàna Ambohikely;
- Ny mponina ao amin'ny Tanàna Manjaka;
- Ny mponina ao amin'ny Tanàna Andranonahoatra.

Adidin'ny VOI ny mamoka ny lisitry ny olona feno 18 taona no miakatra manana zo sy andraikitra amin'ny fitantanana, ny fitrandrahana ary ny fiarovana ireo harena voajanahary azo havaozina.

And-4: Ireto avy ireo loharanon-karena voajanahary azo havaozina:

- Ny ala voajanahary (Ala Tapia);
- Ny sokajim-bokatra rehetra ao aminy;
- Ny tany tsy manan-tompo.

And-5: Manakery ao anatin'ny telo taona haharetan'ny fifanekem-pamindram-pitantanana ny ala sy ireo harena ao aminy ity bokin'andraikitra ity.

TOKO II: FEPETRA ILAINA HAMPIRINDRA TSARA NY FAMINDRAM-PITANTANANA

And-6: Anjaran'ny VOI ny mametraka rafitra hitantanana sy hampiasana ary hiarovana ny harena voajanahary azo havaozina voalaza ao amin'ny andininy faha 4

And-7: Ny Dinam-paritra no mametra ny zon'ny tsirairay sy ny sazy ampiharina raha misy ny hadisoana. Ny Lehiben'ny Distrika dia anisan'ny mpanara-maso ny fampiharana azy.

And-8: Afaka manangona ny saram-pitantanana avy amin'ny vokatra ala sy ny hafa ny fikambanana VOI LOVAMAHAFINARITRA, mba ho tahiry sy enti-manatanteraka ny asa fampiroborobona, sy ho fanatsarana SY fiharovana ary ho fanatevenana ny harena voajanahary azo havaozina ary koa hiantohana izay mety ho fandania rehetra momba ny fitantanana (fampandehan-draharaha amin'ny ankapobeny: taratasy, penina, vatsy, saran-dalana, ...).

And-9: Tokony hisy mpitahiry vola manatanteraka ny fampidirana sy fandania rehetra eken'ny fitsim-pitondrana. mifidy olona roa koa ny fikambanana ho mpanamarim-bola.

Ferana tsy mihoatra ny **telo hetsy ariary** (300 000 Ar) ny vola ekena ho tazonin'ny mpitahiry vola. Hanokafana kaonty any amin'ny banky ary arotsaka any kosa ny vola mihoatra rehetra.

And-10: Ny mpitahiry vola sy ny filoha no miaraka manao Sonia ny bokim-bola ary manamarina ny fivezivezen'ny vola miditra sy mivoaka, ary manao ny tatitra eo amin'ny fivoriambe.

TOKO III: ANDRAIKITRA ISAN-KARAZANY

MIKASIKA NY FAHEFANA SY NY ANDRAIKITRY NY VOI

And-11: Anjaran'ny VOI no manatanteraka sy manaja sy fitsipi-pitantanana ary manao tatitra momba ny asa vita amin'ny mpifanaraka aminy (Kaominina, sampandraharan'ny ala), ka ny mpitantana no miantso-roka izany. Noho izany ny mpitantana dia tsy maintsy mitazona boky firaketana ny fampiasana ny ala sy ny vokatra avy aminy.

And-12: Manao drafitr'asa isan-taona entina hampiroboroboana ny fitantanana sy ny fanatevenana ny harena voajanahary azo havaozina. Ny Sampandraharaha Teknika sy ny mpanohana miaraka aminy no antsoina hanohana azy ara-teknika amin'ny famolavolana izany.

And-13: Mandray anjara amin'ny fanatevenana sy fanatsarana ary fiarovana ny harena voajanahary azo havaozina:

- Miady amin'ny doro-tanety;
- Manao filazana amin'ny Kaomity mpitantanana ny olona izay handoro tanim-boly na fako;
- Manao aro-afô 5 m (metatra) ny sakany ary miantso olona 7 (fito) farafahakely amin'ny andro hanaovana ny fandroana;
- Mamboly zana-kazo araka izay voafaritry ny drafitr'asa isan-taona isan'olona.

And-14: Manao aro-afô ao amin'ny ala tantanina ny VOI, miankina amin'ny fivoriambe ny fanatanterahana izany.

And-15: Mampihatra ny fitsipi-pifehezana araka izay voarakitra sy araka izay nankatoavin'ny VOI.

And-16: Manaraka ny fepetra nifanarahana ao aorian'ny fifampiraharaha miaraka amin'ny Sampandraharan'ny ala sy ny Kaominina. Manaraka sy manaja ny lalàna mifehy ny fitantanana sy ny fanatevenana ny harena voajanahary azo havaozina izay voalazan'ireo lalàna manan-kery.

And-17: Manara-maso ny fivezivezen'ny olona sy ny fakana ny vokatra ao anatin'ny faritra tantanin'ny VOI LOVAMAHAFINARITRA

And-18: Ny fikapana ny hazo novolena (kininina, kesika, sns...) ao amin'ny Fokontany Ambohitatovo (na hazon'ny Vondron'Olona Ifotony, na an'ny Fokonolona, na an'olon-tsotra) dia ny Komity Mpitantana no manamarina ny fangatahana alohan'ny hakana ny fahazoan-dalana hanapaka hazo any amin'ny Sampandraharan'ny Ala. Handoavana saram-pitantanana ao amin'ny V.O.I araka izay voafaritry ny V.O.I. izany.

Anjaran'ny VOI ihany koa no manaramaso miaraka amin'ny Ben'ny ala ny fakan'ilay mpangataka ireo hazo.

Raha ho entina mivoaka ny faritra dia tsy maintsy hakana MBAY LALANA na (Laisser-passer) any amin'ny Sampandraharan'ny Ala miaraka amin'ny fangatahana izay efa voamarian'ny komity Mpitantana ary tapakila nandoavana ny saram-pitantanana sy ny tamberim-bidy tany amin'ny VOI sy ny Kaominina.

And-19: TSY maintsy manao tatitra amin'izay zavatra miseho ao amin'ny faritra misy azy ny V.O.I, toy ny fitrandrahana sy ny fampiasana ny ala ary ny sokajim-bokatra misy. Ny komity mpitantana no manao ny tatitra any amin'ny Sampandraharahan'ny Ala sy ny Kaominina.

And-20: RAHA MANAO TATITRA TSY MARINA ny komity mpitantana dia azon'ny Sampandraharahan'ny Ala sy ny Kaominina enjehina araky ny lalàna misy.

NY FAHEFANA SY NY ANDRAIKITRY NY KAOMININA

And-21: Ny Kaominina no mpiahy ny vondron'Olona Ifotony voalohany.

- Manara-maso ny fitantanana izay ataon'ny Vondron'Olona Ifotony;
- Manampy ny komity mpitantana amin'ny fampiharana ny fitsipika anatin'ny Dina ary afaka mampiakatra raharaha any amin'ny ambaratongam-pahefana ambony;
- Mandamina ny fifanolanana misy ateraky ny fitantanana ny harena voajanahary azo havaozina;
- Manampy amin'ny fanentanana ny Vondron'Olona Ifotony amin'ny fitantanana ny harena voajanahary azo havaozina;
- Andraikitra ny Kaominina no mankatoa ny fitsipi-pifehezana novolavolain'ny vondron'olona Ifotony ary ny Ben'ny Tanana no mamoaika izany ho ampiharina;
- Mandray ny tatitra ny asa vita momba ny fitantanana avy amin'ny Vondron'Olona Ifotony;
- Mandray sy manao laharam-pahamehana ao amin'ny drafitra fampandrosoana ny Kaominina (PCD, SAC, sns...) ireo tetik'asa atolotry ny V.O.I.

TOKO IV: SAZY AZO AMPIHARINA AMIN'NY DINA

And-22: Natao hifampifehezana ny tsirairay ao ANTANETY EST sy hifehy ny faritra tantanina ny Dina ka anjaran'ny fikambanana LOVAMAHAFINARITRA ny mampihatra avy hatrany ny sazy amin'ny mpanao hadisoana. Amin'ny fandraisany an-tanàna ny fitantanana ny harena voajanahary sy ny fahazoany ireo fahefana nfindra aminy dia tsy tokony hisalasala hampiatra ny Dina ny VOI, indrindra fa ireo Komity mpitantana misolo tena azy. Ny fandraisana andraikitra ny VOI dia porofon'ny finiavany hanaraka an-tsakany sy andavany ny fifanekem-pitantanana.

And-23: Andraikitra ny VOI ny mikaroka ny mpanao hadisoana rehetra mikasika ny fitantanana ny harena voajanahary.

And-24: Tompon'andraikitra tanteraka eo anatrehan'ny fanjakana ny mpitantana amin'ny hadisoana rehetra mitranga amin'ny faritra misy azy na ataon'ny mpikambana izany na fahadisoana ataon'olon-tsy fantatra ary ny fahadisoana amin'ny fitantanana.

And-25: Raha olona ivelan'ny Fikambanana no manao fahadisoana dia ampiharana ny fikambanana ihany ny Dina. Raha tsy vita ao an-toerana ny fandaminana ny raharaha dia entina eo anatrehan'ny Kaomina izy mba ho faiziny. Raha toa ka mbola tsy manaiky hanefa ny saziny eo anivon'ny Kaomina izy dia ampiakarina amin'ny tompon'andraikitra ambony (Ben'ny Ala, Zandary) ny raharaha.

And-26: Arakaraky ny havesatry ny hadisoana no irotsahan'ny Ben'ny Ala hanenjika ny hadisoana arapanjakana na amin'ny fampakarana ny raharaha any amin'ny fitsarana ankoatry ny sazy ampiharina ny fikambanana araky ny voafetran'ny Dina.

NY FAHEFANA SY NY ANDRAIKITRY NY BEN'NY ALA

TOKO V: FISAFOANA SY SAZY AMPIHARINA AMIN'NY MPITANTANA

And-27: Ny famindrana amin'ny am-pahany na tanteraka amin'ny VOI LOVAMAHAFINARITRA ny fahefana hitantana ny loharanon-karena voajanahary ao aminy dia tsy manakana ny Ben'ny Ala hanao fisafoana araka ny zo ananany araka ny lalàna.

And-28: Mandritry ny fisafoana dia azon'ny Ben'ny Ala atao ny manadihady eo an-toerana ny fandehan'ny fitantanana ny loharanon-karena voajanahary mety havaozina amin'ny ankapobeny.

Anjaran'ny Komity mpitantana ny manome fanazavana momba ny zava-miseho mikasika ny hadisoana niteraka fahavoazana amin'ny loharanon-karena, ahafahan'ny Ben'ny Ala mpisafy mandanjalanja ny fanapaha-kevitra tokony horaisiny.

And-29: Toy izao manaraka izao ny hadisoana mety hitranga sy ny sazy ampiharina mikasika ny fitantanana:

Fanomezana fampitandremana amin'ireto hadisoana ireto:

- tsy fampiharana Dina amin'ny olona manao hadisoana;
- tsy fanaovana ary tsy fanatanterahana drafitr'asa isan-taona;
- fisiana fanapahana hazo tapia tsy nandraisana andraikitra.

Fampiatoana ny fifanekena

- rehefa nahazo fampitandremana in-telo;
- fisiana fanaovana teviafa tsy nandraisana andraikitra;
- fisiana doro-tanety tsy nandraisana andraikitra.

fanafonana ny fifanekena

- rehefa nahazo fampiatoana indroa;
- fisiana doro-ala tapia tsy nandraisana andraikitra.

Anaovan'ny ben'ny ala fitanana an-tsoratra daholo ny fanadihadiana rehetra ataony sy ny sazy ampihariny ka omeny fitanana an-tsoratra tsirairay ny fikambanana LOVAMAHAFINARITRA, ny Ben'ny tanàna ary ny Lehiben'ny Distrika.

TOKO VI: FEPETRA SAMY Hafa

IREO ANDRAIKITRA ISAN-KARAZANY

And-30: V.O.I no manara-maso ny fikapana na ny fandavoana ny hazo (ankoatry ny hazo voajanahary) ao anatin'ny faritra Tantanina:

- Ny komity Mpitantana ao amin'ny VOI « LOVAMAHAFINARITRA » no MANAMARINA ny fangatahana ho an'izay olona hanapaka hazo vaventy ao amin'ny Fokontany ANTANETY EST;
- Ny Sampandraharahan'ny Ala ihany no manome ny fahazoandalana hikapa hazo (Permis de Coupe);
- Ny hazo maina am-potony (Tapia maina) ao anatin'ny Ala Tantanina dia ny Vondron'Olonana Ifotony ihany no manana zo aminy;
- Ny V.O.I no manao izay fomba tsy hanitaran'ny olona ny tamboliny any anaty sy manamorona ny ala Tapia.

And-31: TSY azo atao ny manao Charbon ao anaty sy amoron'ny Ala Tantanina mba hisoroana ny doro tanety. Ny olona manao charbon eny ivelan'ny faritra Tantanina dia tsy maintsy manao aro afo Fito (7) metatra (ny velarany) fara-fahakeliny manodidina ny fatana.

And-32: Tsy maintsy manao fivoriambe-pokonolona indray mandeha isaky ny enim-bolana (6 volana) ny VOI hanaovan'ny Komity mpitantana tatitra momba ny fandehan'ny fitantanana ny harena voajanahary iandraiketany sy afahan'ny fokonolona mandrefy ny dingana vitany sy ny fahavitrihan'ny fitantanana nankinina aminy (vola, fandehanan'ny asa, ny olana, sns ...).

And-33: Manankery sy hampiharina ao amin'ny faritra tantanina avy hatrany ity bokin'Andraikitra ity rehefa vita sonian'ireo voakasiky ny fifanekena.

Natao teto ANTANETY EST, Androany faha,

Ny Tale Iraisam-paritry ny
Tontolo Iainana sy ny
Fandrosoana Lovainjafy Itasy,

Ny VOI LOVAMAHAFINARITRA,

Ny Kaominina Arivonimamo II,


Ny Distrika Arivonimamo,

DINAM-PARITRA

DRAFI-PIHARIANA

TOVANA

FANGITRY NY FARITRA TANTEZAINA :



Laharana	X	Y
0	484 127,72	788 746,73
1	483 917,09	788 380,95
2	483 657,94	788 009,80
3	483 676,85	787 959,29
4	483 728,06	787 666,50
5	483 585,67	787 205,35
6	483 234,90	786 951,23
7	483 059,92	786 883,64
8	482 689,01	787 216,05
9	482 382,91	787 593,36
10	482 087,64	787 972,68
11	481 791,30	788 350,39
12	481 511,84	788 744,29
13	481 541,46	789 135,22
14	481 300,63	789 515,81
15	481 532,33	789 920,88
16	481 627,55	790 357,13

Laharana	X	Y
17	481 650,23	790 734,40
18	481 948,23	790 998,58
19	482 208,62	790 814,64
20	482 370,20	790 422,94
21	482 556,99	790 210,54
22	482 937,27	790 150,51
23	483 135,96	789 715,47
24	483 484,32	789 412,78
25	483 694,74	789 103,09
26	482 075,36	790 962,03
27	481 699,69	790 939,64
28	481 575,28	790 510,35
29	481 586,96	790 104,13
30	481 352,99	789 709,73
31	481 435,94	789 330,17
32	481 644,62	788 878,56